


0 10 20 30 40 50 60 70 80 90 100 110 120 130 140 150 160

卷 571.10
794
= 3

Kodak Color Control Patches

4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32





建文年譜卷三

草莽史臣東萊趙士喆纂修

男濤



癸未樂元年

師二十七歲為僧

春正月 師至雲南永嘉寺命馮灌如襄陽

從亡隨筆曰癸未正月 師投雲南永嘉寺命馮

灌往襄陽探廖平家事六月灌還知梁良玉卒

三月諸弟子會于襄陽

致身錄曰癸未春彬往襄陽正月二十日為襄陽

之行三月初三日至廖平家牛景先已先在矣閱

建文年譜
六日馮灌自雲南來四人相對大慟馮告以師
向留雲南永嘉寺亦甚安妥期明年來遊天台今
無煩往復居停旬日諸弟子皆會惟梁良玉已物
故矣月終東歸

故中書舍人梁良玉卒

按吾學編及表忠記良玉定海人京師陷走海南
易姓名鬻書爲業癸未年死 建文以詩哭之曰
子犯歸黃土重耳未還時良用田玉中節皆同族
良用投水死後松陽王詔游治平寺聞轉輪藏上

簌簌有聲使人緣其頂得書一卷載出亡臣僚二
十餘人紙漚爛不可讀其可識者僅得九人而良
玉良用等在焉詔以其得之之異各贊數語號曰
忠賢奇秘錄鄭曉合而爲之銘

銘曰今吾故吾知我者誰慘比漆身踪希采薇戢
戢潛龍寥寥冥鵠豈吝箕疇而甘漢卜山陬水澁
天涯海濤會其可憑鼓以南音肯欠一死以明我
心白霓晝見虞淵沉沉孰阿護此悠悠古今

草莽史臣曰崇禎辛巳予在濰陽作 建文年譜

至哭良玉詩有重耳未還之句似是結語而不得其全深以為恨乃擬作一篇其詞曰梁生出東海皎皎冰雪姿翱翔紫微省吟哦紅藥詩忠孝填肝膈九死不肯移熒惑入南斗烈燄燔罌愚蛟龍與猿鶴倉皇迷所之嗟我二三子共為千載期灌也至自楚聞爾與世辭天地信不仁逝者寧有知慟哭荒山暮魑魅為我悲子犯歸黃土重耳未還時既又轉末二句為一詩云重耳未還時子犯歸黃土歸者一何樂存者一何苦俯慚殉難臣仰愧開天祖興亡有代謝此恨無終古懸知讀史人千載悲壬午作譜之明年歲星復次于壬午又二年而神京遂不守矣予深慟先帝之身殉社稷不辱高皇怪羣臣死者寥寥殊為扼腕偶閱前詩遂復作一律云在昔悲壬午于今恨甲申一人單死難百辟再稱臣科目原無骨詩書尚有神以茲漆室女甘作未亡人詞雖不工頗稱實錄附于年譜藏之深山倘得如轉輪藏頂之書行于人世後之君子庶幾見予之苦心焉

夏六月灌歸自襄陽復命

王廷宰曰史仲彬廖平金焦趙天泰鄭洽劉仰王之臣遜國臣記俱失其名姓灌失其名稱馮翁翁傳略云在夔州爲童子師有所賦輒題馬二嘗作詩大書壁間見補鍋匠卽剗去之詩云夜夢何奇特龍飛天漢津朝游滄海曲暮過滇池瀕光霁皆五色蜿蜒無損鱗淵田變化間張主借高旻詩猶有不忘飛躍之意補鍋匠往來夔慶間爲人補鍋囊橐稍充遇風雨寒暑輒不出逢馮翁相顧愕然

已而相哭入山巖中語竟日又哭別云自此永訣矣竟莫知所終按此卽王之臣也

注曰以補鍋匠爲王之臣本史氏之書也程以爲侍中黃直接直與灌壬申來省乙未秋同死雲南僧舍則夔市永訣莫知所終者非矣以爲之臣者近是程氏又以之臣爲葛衣傭詳見乙酉丙申年當參攷之

冬籍長興侯耿炳文炳文自殺

炳文次子璿尙江都公主故炳文北征無功得不

建文年譜 卷三
罪建文遜位日與公主閉門悲泣至是陳瑛劾其服御僭尚方物詔籍其家炳文惶懼自裁駙馬璿璿兄璿皆以罪死國除

草莽史臣曰長興從太祖同赴淮西艱難百戰而開茅土方其摧土誠障江浙一何壯也登壇授鉞狼狽而歸又何憊也豈英雄末路精已銷亡抑真人天授人力固無如何耶兵敗不死君奔不死而死于賊瑛之羅織晚矣晚矣表忠記誤以爲陣亡與瞿能同傳予特攷其實而志之于此

甲申二年

師二十八歲爲僧

春正月 師在永嘉寺是月北行應能應賢程濟從從亡隨筆曰甲申正月離雲南三月到襄陽就牛景先于西山

三月詔封故徐王允熾爲甌寧王

三月二十七日封甌寧王詔略云朕聞帝王之道立愛惟親爲子不祇不及于父 懿文皇太子降生弗永幼冲嗣位顛覆舊章戕害骨肉社稷幾墜賴天之祐內難克清朕以宗社爲重勉狗輿情君

臨大寶 長兄諸子允燿允燧仍嗣王位不意允燿允燧弗知省躬自生疑懟朕以 長兄至情不免譴責免爲庶人以保全之朕痛切于心長存念慮 長兄未嗣其第四人允燠生十有四年矣資器端重改封甌寧王世守 懿文皇太子之祀於戲協和之道睦族爲先惇敘之仁繼嗣爲大庸展同氣之情庶敘親親之誼布告天下咸使聞知允燠尚幼未遣之國隨母居懿文墓側或恆侍禁中夏太子少師姚廣孝賑濟蘇湖

初廣孝爲僧姊知其好殺常勸之曰汝旣爲和尚當發慈悲心及靖難兵起廣孝在軍中爲之謀主姊聞之嘆息謂其家人曰和尚慈悲當如是耶廣孝至是以賑濟還鄉往見姊姊拒不見曰貴人何用至貧家廣孝大慚盡屏車騎易僧服往姊不得已乃出見廣孝連下拜不已姊曰我安用汝許多拜爲會見做和尚不了是甚好人言訖入口終不復見

草莽史臣曰賑濟蘇湖何以書爲廣孝姊也洪武

中年懿文無恙藩釁未開卽自請竄名 燕邸其
設心爲何如乎舊配饗 文皇帝廟至 世宗始
斥歸僧寺煌煌聖斷超叔孫昭子遠矣闔門數語
凜烈悲傷令讀者肅然起敬彼姝者子卽倅之遜
國名臣何所讓焉

秋八月 師至吳江

致身錄曰甲申八月 大師同楊程葉三人來彬
家先是七月牛景先來言 師將至矣至是八月
初九日天將暝一僧突至忠孝堂彬及家人出拜

畢欵至重慶堂已舉燈矣楊程葉亦至舉酒半酣

師曰我明晨當卽去彬惶悚曰弟子掃門而俟
久矣卽有不恪 師當見原本意欲留師幾月奈
何明晨之云乎 師泣曰彼方覓我而圖我昨于
四安道中見冠蓋來者瞪目而視此臣我曾目善
之彼必有以奏也東南逋臣屈指先若我若正爲
汝計相對而慟久之且曰此近宮闕不便彬曰亦
不妨視 師衣履敝甚固留三日命家人製 師
衣服俱用綿綢大小計十六件楊程葉俱用綿布

大小計三十六件白金十兩爲資

師遊于杭應能應賢程濟史仲彬牛景先從

從亡隨筆曰五月命景先入吳約史仲彬六月

師行八月至彬家一宿遂行彬問奚速師曰昨

道中遇一冠蓋者瞪目視予予去正爲爾也相與

泣下師與濟先行賢能景先仲彬以次會于吳

山遂同遊西湖

九月九日師登天台蔡運馮灌劉仲金焦來會遂遊

雁宕遇廖平于耶溪

致身錄曰十三日清晨師爲兩浙之游杭州計

遊二十三日天台雁宕計遊三十九日時馬二子

稽山主人金焦亦來會于石梁間且云諸友皆約

于此會然終不一見時天氣已寒師欲返雲南

固卻諸人而去

從亡隨筆曰重九登天台運焦灌仲等皆至運亦

祝髮稱稽山主人灌稱塞翁遇廖平于耶溪十一

月離台州

附錄 憲章錄及表忠記載牛景先初爲御史改

鎮撫禦靖難兵有功劉仲亦同爲鎮撫其出亡又
同爲道士景先夜走丹陽遇一僧曰徐行吉疾行
凶遂易名爲徐行嘗從 建文于襄陽後客死杭
州僧舍 朝廷聞景先破鬼門事逮其家屬妾劉
氏發教坊司劉仲自會 建文于天台遂留寺中
以老死 建文嘗訪鄭洽于浦江其堂中扁 建
文親筆無故墜地 建文驚遁尋偵者至無所得
乃免洽後省 建文于蜀道病留公安茆舍中卒
史仲彬以稽山主人爲宋和按奇秘錄稱宋和攜
卜筮書客死異域未聞其祝髮爲僧程濟以爲蔡
運者近是運嘗隱于會稽雲門寺每令童子攜茗
椀筆牀泛舟而遊賦詩滿袖歸則焚之

草莽史臣曰是會有弟子十人曰運曰焦曰灌曰
仲曰平曰景先曰仲彬曰能曰賢曰濟所遊之境
曰西湖曰吳山曰天台曰雁宕曰耶溪曰石梁發
舒幽憤笑傲烟霞凡兩閱月亦人生之難再者也
壬午重陽流離野店尙有黃花之倡和而况茲勝
會乎予嘗擬聯句一篇卽用前詩爲起句其詞云

黃花滿地帶霜開木落天高旅雁哀前歲葛衣吟
野店今秋奠酒醉天台風塵東北休回首雲水西
南好放懷山鬼隔林遙頂禮分明十弟擁如來亦
頗肖當時情境若諸公所倡和其奇偉卓絕不問
可知節義文章山靈生色得與茲游者其賢於金
谷蘭亭當百倍也

冬十一月 師南還應賢能程濟從

十二月故大將軍曹國公李景隆伏誅

初景隆再敗王師舉朝憤恨以迎附功寵任益隆
賜號奉天護運推誠守正武臣增祿千石又使監
修實錄諸功臣皆恥與爲伍 天子雖外示崇重
而心薄之景隆遂僭踰不法諸司連章劾其罪並
及弟增枝 上特宥其死沒其莊田令杜門省愆
或告其造妖讖謂十八子當有天下 上大怒執
景隆至將誅之景隆呼曰 陛下非得臣開門何
以至此 上笑曰幸是朕來他人來汝亦開門耶
景隆語塞遂死于獄家人幽閉四十餘年男女至
相配偶谷王穗亦因讖獲罪谷王者 高皇帝第

十八子也

草莽史臣曰書故大將軍罪其賣國也書曹國公罪其辱先也不書反者景隆之罪則不容誅而反謀實未白也表忠記附三不忠傳以景隆爲首陳瑛與茹常次之蓋取毆陽唐六臣之例年譜於三臣之敗書伏誅以正其罪而書故官以深愧之以罪係故官之下者蓋見其當誅爲已久矣

配三年

師二十九歲爲僧

春 師如蜀二月至重慶居於善慶里之新菴

從亡隨筆曰乙酉二月 師至重慶雪和尚已結菴于善慶里遂畱居焉

表忠記曰吳成學浙人舉賢良爲翰林修撰壬午之變家人驚潰以爲已死成學隱名姓爲僧曰雪和尚又號雪菴走重慶之善慶里里有隱士杜景賢異之與之游白龍諸山山有松柏灘沙水清駛蘿篁陰蔚和尚愛之景賢爲造菴和尚招徒數人入居之晨夕誦經諦聽則易乾卦也景賢曰和尚貌釋而誦儒不可乃授之

建文年譜 卷三 十一
觀音經遂常誦之 建文嘗過善慶里題其居曰
觀音菴

夏六月 師欲適雲南不果

從亡隨筆曰師欲適雲南命濟筮之得乾之姤濟
曰恐有偵我者已胡濙鄭和等果入雲南遂止不
往

冬十一月駙馬都尉梅殷爲盜所殺部將瓦刺灰死
之

殷夏邑人好學有謀善騎射尙寧國公主 太祖

愛之受密命輔 建文帝北兵起充總兵官鎮淮

安 成祖使假道於殷殷拒之其詞甚峻乃自別
道渡江既踐阼迫公主爲血書招殷殷得書大慟

問 天子安在曰去矣殷嘆曰 君存與存君亡
與亡吾姑俟之乃還京 上曰駙馬在軍中勞苦

殷對曰勞而無功 上憾之陳瑛劾其招藏亡命
上弗問至是早朝經竹橋都督譚深令趙曦擠

殷下水中死 上罪二人二人曰 上命也 上
怒立斬之殷幕下胡騎指揮有瓦刺灰者慟哭請

于 上割二人手足取其心祭殷卽自殺葬殷墓
側寧國公主高后長女也

黃直來省留三日辭歸

注曰按表忠記黃直常州人爲禮部侍中程氏以
爲補鍋匠後與馮灌來省卒於途

王廷宰曰河西傭傳云建文六年冬傭至金城行
乞市中金城邊地極寒傭常衣葛明年過河西依
莊浪豪魯家已稍稍取直買羊皮披之必覆以故
葛衣葛縷縷破不肯脫夏或衣暑布布卽新故葛

衣輒覆其上或勸之棄故葛衣意不肯傭力作倦
時自吟哦或夜聞其哭泣聲有留都官從宋總兵
至莊浪者識傭欲與語傭走避南山中旬月或問
留都官傭何人留都官亦不答傭在莊浪數年病
且死屬其主人曰我死勿斂幸西北風大起時火
我勿埋我骨其主從之按建文止四年作傭傳者
竟不用永樂詔書亦此輩人也

草莽史臣曰作此傳者不知誰氏傭不著名史氏
以爲趙天泰程氏以爲王之臣所謂建文六年卽

上歲甲申其客莊浪卽今歲也陶潛不臣劉宋其文章皆題甲子史程著作亦倣淵明若遜國之餘復用故君之止朔浸尋不已將安所底乎夫以甲申爲建文固妄以壬午爲洪武義亦未安至我神祖始詔以建文紀年斯爲萬世之信史耳

丙戌四年

師三十歲爲僧

春正月

師在善慶里

三月

師適雲南應能應賢程濟從

從亡隨筆曰丙戌春三月別雪南行夏四月至西平侯沐晟家

夏四月

師至雲南工部尙書嚴震直自殺

按通紀震直烏程人以富戶人材爲官至工部尙書謙恭質樸太祖嘗呼之爲嚴老實建文中督

餉山東兵敗被執永樂初奉使安南過西平侯第見建文建文曰何以處我震直泣對曰上自便臣自有處夜吞金死于驛舍

草莽史臣曰譜中書自殺者三炳文自殺平安自殺陋之也震直自殺傷之也安等當日勢不得不

死死稍後時遂不得與鐵鉉瞿能比烈震直當日
可以無死感念 故君自殺以明無語泄忠義果
決不負其心我 太祖之所稱良不誣也春秋之
義美惡不嫌同辭

夏五月齊王榑復以罪廢爲庶人

成祖卽位反 建文之政盡復諸王曲加恩禮元
年春代王柱殺人賜書諭之岷王梗擅鑄諸司印
信幾激變諸夷詔降其府僚職事齊王榑歸國日
驕結無賴少年陰圖不軌有告其事者 上不忍

加罪諭令改行召榑入朝既至廷臣交劾之榑厲
聲曰姦臣又欲磔磔效建文事耶 上聞之罷其
護衛尋復以罪廢云

草莽史臣曰嗚呼 建文失國雖曰人事豈非天
運哉當是時強藩互峙各擁精兵其威德日盛如
成祖者旣不能無相疑之勢其荒淫濟惡卽榑梗
輩又法所難容動一親戚天下環視而起爲之上
者不亦難乎削諸王不忍盡書爲 建文諱也榑
復以罪廢則書見其終不可移也非 成祖之廢

之也

師居于白龍山舍

從亡隨筆曰 師至西平侯沐晟家畱旬日會嚴

震直以使事過滇見 師辭去吞金死旅舍晟恐

請 師逸五月應賢應能結茅白龍山深處 師

自是遂定居焉

冬十二月甌寧王允燠薨

按從信錄邸中火起王驚伏于地遂薨年十六無

嗣諡曰哀簡

命禮科給事中胡濙巡行天下

初 建文之遜也世傳主錄僧溥洽為之落髮

成祖疑洽實匿之以他事錮洽十餘年乃釋又有

言其從地道出走滇南投沐氏者使使偵之無踪

跡乃已至是使濙巡行天下徧歷滇黔湖湘之境

以訪仙人張邕還為名蓋物色 建文且以察人

心之向背云

訂五年 師三十一歲為僧

春正月 師在白龍山舍 三月 師有疾

按表忠記初建文君在蜀病痢雪和尚以柏葉丸進三服而愈及在白龍山復病痢不得前藥程濟取柏葉煎湯飲之師又痛念方黃諸臣因而病病逾年始愈及濟病師親爲煑粥食之晝夜坐榻旁不離頃刻濟曰師不死濟何敢死顛沛中言君臣相依爲命如此錢士升贊曰臣也抱足君也煑糜一心相從萬死不移探易之秘決策以奇爲顛爲璞匪夷所思夏師疾未瘳濟祝髮爲僧出山乞食

草莽史臣曰予讀表忠記至師不死濟何敢死嘖嘖嘆咤私以爲孔顏師弟不過如此若乞食供師卽負米采菘者何以加焉予曩所云師弟無父子之恩者不可爲師弟君臣無師弟之誼者亦不可以爲君臣正謂此耳濟之祝髮蓋偶有戒心想未幾卽返初服若賢能雪及雲門僧則竟以浮屠老矣悲夫

秋七月程亨郭節史仲彬何洲來省

致身錄曰丁亥三月同何洲往雲南謁師正月

中遣僮往海州請何洲同到雲南三月終纔到雷
五日彬攜一僮三人皆道人飾行二月得至連州
訪郭節適故翰林簡討程亨在焉相持痛哭徐曰
師近在重慶府之大竹善慶里有杜景隆築室
與居吾四人同往候之留二日遂行至所謂大竹
善慶里 師不在杜亦不在時朝廷偵 師密而
嚴有胡濙鄭和數往來于雲貴間彬等夜則同宿
日則分行相與行乞于市者旬有六日一日彬于
寺舍中暫息比丘程濟熟而視之曰汝在耶彬起

鼓掌曰是急叩 師曰已結菴白龍山深處矣去
此不遙兩人淚下如雨不敢出聲于是同諸人步
往程爲導時七月十八日也月色皎然逶迤曲折
約行十八九里而菴在焉天已微曙矣叩扉而出
者爲楊應能旋拜師榻前 師顏色憔悴形容枯
槁蓋夏日患痢因有戒嚴不能時時出山分膳故
也相對而慟隨問曰汝等帶得方物來與我嘗否
各有 獻彬獨有僮而所獻豐况當年職居禁近
知 師所嗜如金華火肉淡菜金山魚膾笋齏鵝

豆肉鬆六味 師見之大喜即命熟火肉啓牀頭

尊酒啖之曰不嘗此三年矣謂于彬家食後無之

也翌日 師率游山自近而遠日以爲常

八月故太子太傅魏國公徐輝祖卒于獄 召子欽

襲爵欽請守父墓遂謫置中都

成祖入京諸武臣無不迎附唯輝祖不屈下之獄

逼其供狀輝祖無所供唯書其父鬻國勳子孫免

死 上念中山王功大又 皇后懿親特置不誅

至是病卒 詔還其祿米召其長子釋迦保賜名

欽令襲封 欽請守父墓忤 旨謫守中都久之

復爵隆慶六年 穆宗遺詔建文時死難諸臣命

所在春秋致祭褒表忠魂崇禎初錢士升作表忠

記以輝祖爲第一人識者躋之

王世貞曰當 文皇之起兵而徐公其妃弟也公

舍而恬然趨死一何決也于 建文爲純臣子中

山王爲令子矣 文皇以死全公之志而弗奪其

爵以報中山王

王廷宰曰黃太常首建晁錯之策乃舍魏公而薦

景隆何知不史君若也魏公忠勇曉兵略竟以燕
 戚屬見左齊眉之捷旋復召歸金川垂破猶冀常
 開國分道出戰五載幽囚卒以瘐死中山有子哉
 趙士完曰予少聞前輩言太祖有將而無相心
 竊異之乃後知太祖自有兩相未及用中山王
 及誠意伯是也曩在留都觀所謂大功坊者徘徊
 久之惜當時知其功未知其德尋于書肆得史侍
 讀致身錄歸示伯兄伯兄大喜旁采諸書以爲是
 譜于魏公輝祖忠烈尤詳予讀而歎曰父爲勳臣
 首子爲忠臣冠金陵之世守宜哉欽請守墓寓忠
 于孝魏國有子中山王更有孫矣

程亨及郭節辭歸

致身錄曰甫一月郭與程以事請行彬亦以請
 師曰汝遠來固當久留因問汝子年幾何曰十六
 歲矣師曰能辨事否彬對曰尙在書堂師曰
 欲爲官乎彬曰必不敢相與歛歛久之
 表忠記曰亨山西澤州人北平布政張昺之姻家
 也建文初爲翰林檢討京城陷棄家而逃昺旣族

誅尋抄至亨家逮亨妻楊氏及其子禮妻張氏卽
畀女皆自焚死亨至是同仲彬來省後不知所終
冬 師親祭死難諸臣

表忠記曰 建文游蜀宿于逆旅聞人談諸臣之
死事者泣不能寐曰吾得罪神明矣諸人之死皆
爲我也在白龍山感念諸臣而病病愈乃祭于庵
舍親爲文以哭之

應祭文武死難諸臣共四十九人

太子太傅魏國公徐輝

祖輝

太子少保禮部尚書迪

兵部尚書兼布政使

鐵鉉

刑部尚書督漕運候泰

御史大夫練子寧

侍讀直文淵閣方孝孺

禮部侍郎黃觀

戶部侍郎郭任

戶部右侍郎卓敬

禮部侍郎陳性善

兵部侍郎陳植

刑部侍郎採訪使暴昭

右副都御史茅大方

左簽都御史景沂

大理寺卿彭與明

大理寺少卿胡潤

太常寺少卿廖昇

翰林院修撰王良

翰林院修撰王叔英

戶科給事中龔泰

禮科左給事中黃鉞

監察御史高翔

監察御史魏冕

監察御史曾鳳韶

監察御史監軍務王彬

大理寺丞鄒瑾

中書舍人梁良用何申

北平左布政使張昂

浙江按察使王良

江西按察副使程本立

燕府左長史葛誠

谷府左長史劉璟

遼府左長史程通

晉府左長史龍鐔

寧府左長史石撰

衡府紀善修國史周修是

督府斷事參軍務高巍

徽州府知府陳彥回

蘇州府知府督軍務姚善

北征都督瞿能父子三人

北平都指揮使謝貴

都指揮彭二

都指揮使馬宣

大寧都司守將卜萬

北平行都指揮使朱鑑

燕府護衛指揮使盧振

王世貞壬午諸臣贊曰桓桓鼎石

高皇所器完

瑕立堅鼓敗為銳大厦拉邏一木焉制抗節內廷

捐軀東市譬彼隕璧光完魄碎希直儒雅先民是

程翦遏戎機鋪張治平絕命長哦麗日經星流誼

滄海建標赤城景道矯矯宣威滇池春秩春宮寅

清 帝儀礎鏤鑊烹肉飴子孝父忠袁卞同
辭有斐瀾伯公車駿發銜新蟬冕職邇璽節飛檄
逾琳投湘擬屈臣操松筠閫儀霜月蹇蹇子寧著
聲中外師臣失律以寵自解抗辭請執不塊司敗
玉屑遺芬金川表派英英卓公徵奇履虎曲突能
謀逆鱗非忤歸誠 故天流惜 新主疇云孔壬
乃實愛汝復初長者獻替是勞御李輿尸憑河殉
要大方佐秦毋忝祖焦入台而殞卒以節昭於赫
秋官有候有暴暴司采訪以燕事告候漕六師無

絕甬道斷舌餘聲抉心猶跳高既宏識曾亦強辨
賈傅請纓魯生飛箭妖鵬垂凶蹈海終踐訪魏雖
廛狗隱曷變叔英讚夷乃甘食薇殷德爲是周粟
爲非是修申雉在閣尊經前峙孔廟後瞰 鍾陵
良焚錢塘程到豫章心無變謫道不移亡穆如元
一宣猷股肱化美文翁剖同果鄉鉞也苦士日沉
于齋外無負友內不辱親士淵循吏狗知酬宥彥
亨純孝感親捐脰嗟此貞臣以及吉士封疆能死
社稷是衛精白旣同休采曷異竄跡文身不可過

計皇皇魏公氣如長虹委心 王室削欵椒風璟
亦負奇出控藩封從理入口皆以餓死武寧不沒
文成有子終有後先死無彼此烈烈景君詭跡專
響山魑避名文曲徵象憤擬伍員俠肩豫讓事違
志畢形泯神王 聖皇開天爰立臣則錫胤旌祠
以垂無極泊江揚波首陽獻色我作頌詩有光明
德

草莽史臣曰壬午之夏諸臣死難皆不書不忍書
且不勝書也至是不錄則無以知祭者之爲誰故
想像錄之以見其概也齊黃未必不與祭以其誤
國故特黜其名疏遠小臣當時之祭必不得沾以
忠不可磨故特從附錄先列朝臣方面共若干而
次以世貞之贊後附小臣若干而次以李贄之序
庶以補祭文之彷彿云爾

附錄疏遠死難小臣共二十八人

松江府同知周繼瑜

獻縣知縣向朴

蕭縣知縣鄭恕

沛縣知縣顏伯瑋

漳州府教授陳思賢

濟陽縣教諭王省曾

燕府伴讀官余逢辰

東平州吏目鄭華

沛縣主簿唐子清

武清縣典史周縉

北平府賢良杜奇

應天府己卯舉人劉政

北征裨將皂旗張

莊得
楚智

河北倡義指揮張綸

楊州守禦指揮崇剛

漳州生員林珏陳應宗

伍性原呂賢鄒默曾廷瑞

尙書陳迪子鳳山

翰林檢討程亨子禮

少卿胡潤子傳道

臨海樵夫失名

李贄序遜國臣記日記首方黃見遜國之事所繇

成次張昺見靖難之師所以起第二卷首徐輝祖

與梅殷是誠遜國之名臣也若文職其人最堪托

者則鐵尙書鉉等其言最堪采者則周是修王叔

英黃鉞韓郁高巍尹昌隆等而其中最得力者則

有程編修濟在故以尙書侍郎九卿翰林爲第三

卷科道爲第四卷布按三司府州縣佐雜以教官

生員衛卒等爲第五卷其有名無官有官無名及

官名俱泯恍恍惚惚莫可推尋若轉輪藏頂一書

及補鍋匠等爲第六卷而以吳亮狗飴子鵝爲第

七卷終焉嗚呼爲臣不易讀之真令人心死矣讀書種絕不其然乎

注曰大倉王氏諸臣贊原以鐵鉉方孝孺陳迪黃觀練子寧卓敬陳性善茅大方候泰暴昭高魏曾鳳韶王叔英周是修王良程本立姚善黃鉞陳彥回程通徐輝祖劉璟景清齊泰黃子澄張統爲序茲刪去齊黃張統增十許人皆以爵序而贊文則仍其原本溫陵李氏續藏書本鄭端簡遜國純臣紀凡才德知名者則錄不盡以死難與從亡也按表忠記及朝野彙編載死難者尙有數人未及盡錄俟再考之

戊六年

師三十一歲爲僧

春正月 師在白龍山舍三月史仲彬辭歸

致身錄曰自後屢請屢留竟延至明春三月行之日 師痛哭失聲屬曰今後再勿復來道途修阻一難關津盤詰二難况我安居不必慮也彬等叩首領命而行

草莽史臣曰仲彬書載偕洲同往從亡隨筆偶遺

其名亨節既歸今稱彬等非洲與同往還乎觀吞聲相屬之言及叩首辭行之狀銷魂刺骨千載如生王廷宰謂開闢以來叛見之奇事良不虛也

夏六月庵災秋七月復葺庵成

從亡隨筆曰七月濟出募葺庵道長張靜成之濟筮得小過之旅曰鳥焚其巢不久將毀

倭寇台州故教授林右治兵守禦召右赴闕右不屈死之

初右爲中書舍人與方孝孺爲莫逆交奉 璽書

行邊有功進春坊學士輔 皇太孫以事謫中都

教授掛冠歸後聞方孝孺族誅爲位而哭戊子烏夷訶海上監司聞右材請爲閩里計右勉起視兵督郡子弟剿平之

上以此知右遣使召之不赴械至京猶以溫語相慰冀錄用右對云罪人逃死已久藉令可月當與孝孺同朝矣 上怒命剿之竟死今祠鄉賢

草莽史臣曰表忠記以右與張統樓璉同謂之死義而嚴震直謂之後死余竊以爲不然夫人之死

有遲之頃刻而卽晚者樓張是也有遲之數年而不爲晚者謝枋得文天祥是也右爲位哭孝孺時已置死生于度外但不求死耳使稍有自全之意安敢以治兵聞耶特書死之與以全節蓋與文謝相伯仲視震直又高一籌矣

冬十二月金焦黃直吳成學來省

注曰從亡隨筆書焦雪黃直皆至此竟書成學者雪乃其號不可以達于師也雪卒有論見永樂十五年

丑七年

師三十三歲爲僧

春正月 師東遊程濟金焦黃直吳成學從

從亡隨筆曰己丑正月 師東行留賢能守菴濟及雪直焦從至善慶里

遣太監鄭和至滿刺加遂徧歷西洋諸國

建文之遜或以爲匿平西侯家或云泛海入西洋諸國是年正月命鄭和領兵駕巨艦自福建至長樂五虎門航大海西南行抵林邑又自林邑正南行至滿刺加以達西洋古里大國遂分航徧往支

國以取寶爲名或曰爲尋訪元朝玉璽實以踪跡
建文君亦遣潑之意云

王來儀曰 建文君偕徒眾駐雲南之五華寺深
藏不與人接已漸有疑之者乃移羅婆之獅子山
居稍久以土官鳳氏意稍懈復移去壁題悉爲鳳
氏所剗按 文皇愛壻稱五駙馬卽黔寧次子昕
下西洋鄭和卽滇之昆明人而二人若不聞有寓
跡者噫當日人心亦大可見矣

注曰王來儀亦雲南人鳳氏爲雲南土官萬歷中
與播囚婚者乃其後裔史仲彬云至白龍山訪菴
爲上司所毀此上司必是土司蓋傳寫之譌也羅
婆及獅子山未詳

二月故兵部尙書茹瑞有罪伏誅

瑞衡山人建文初爲吏部尙書代齊泰爲兵部尙
書常私使人如靖難師以虛實告 成祖之次龍
潭也瑞與李景隆同使議割地請和旣見遂叩頭
勸進 成祖踐阼以推戴功封忠誠伯尋以罪除
名回籍爲家人告其陰事械至京久之得釋還道

經長沙以不朝谷主爲陳瑛所劾復逮至下錦衣
衛獄瑞自分不免命其子詮市砒霜藏飯中自斃
詮坐殺父律論死婦女送浣衣局幼男發鞍轡局
人咸快焉

三月 師至善慶里焦同成學留居 師東下濟從
表忠記曰金焦貴池人建文初以御史陞刑部侍
郎論李景隆不可任壬午同出亡之約來省雲南
至是同雪菴留居於蜀後與王資往河南死於祥
符

駕幸北京後軍都督府僉事平安自殺

初景隆之北伐也唯安與瞿能爲軍鋒冠白溝之
戰手斬陳亨戰於小河安操長鎗追 成祖及之
馬蹶被執 成祖問曰非馬蹶汝將何爲安曰刺
殿下如拉朽耳 上嘆曰 高皇帝養下好漢釋
而勞之仍命爲都督委任無間至是 上幸北京
在途中因羣臣奏事問平保兒無恙平安聞懼不
免遂自經死保兒者安小字也

錢士升贊曰庸固桓武安亦驍雄屢敗不休血戰

多功埃昏徵禍馬蹶占凶皇天不祐上將星空黃
塵碎首慚彼英風

夏五月 師至襄陽

從亡隨筆曰五月 師至襄陽知廖平等全家徙

蜀

注曰 師至襄陽者視故太子也平雖寓會稽必
常往來於楚蜀故 建文復訪於襄陽至是則合
家徙蜀時太子生十四年矣平卒詳見宣德三年

庚八年

師三十四
歲爲僧

春 師南下三月還菴

附錄 是年寧海侯何福自殺先是耿盛平安皆
不得善終吳高徐凱等死爵不傳於是北征諸將
盡矣

陳建曰 建文諸將北向拒戰如耿盛平安何福
景隆輩初雖以歸附獲宥後來俱不得其死噫諸
人之死視鐵鉉等僅數歲耳何若鉉等爲能自靖
而無愧乎

卯九年

師三十五
歲爲僧

春正月 師在白龍山有司毀菴 師西下

三月故北平按察使陳瑛有罪伏誅

初瑛在北平受燕府金錢爲僉事湯宗告發編管

廣西又 成祖踐祚召爲右副都御史凡 建文

諸臣宗戚受禍皆瑛所羅織方胡二案抄提至數

百人男女至東市號泣徹天諸御史皆爲掩泣瑛

謂人曰不以叛逆處此輩則我等歸附無名已而

復奏言黃觀廖昇王叔英周是修王良顏伯瑋皆

不順天命與叛逆等宜加顯戮上曰彼食其祿自

盡其心耳勿問然有寵於 上所劾無不允益肆

羅織中外畏之七年給事中耿通劾其朋比蒙蔽

誣陷主事李貞置之死八年劉子春劾其方命刻

薄 上亦屢聞其奉職無狀乃下獄誅之籍其家

錢士升論曰忠臣殉國非求生也而終不死賊臣

市國欲免死也而終不生夫君猶人也天道緝然

而善謀疏而不失傅瑕服貳里克見佞謝晦狼籍

柳璨塞謗自以爲有佐命功永保富貴而不得良

死天也景隆輩辱同孥戮慘埒夷宗其偷息賈榮

多不過八九年耳寧知二百餘年後 兩朝恩詔
裹表忠魂三臣朽骨猶有操筆而誅其罪乎爲人
臣者可以鑒矣

夏四月 師定居於浪穹

從亡隨筆曰 師至浪穹賢能募建成菴舍濟筮
之得坤之剝曰剝盡而順吉卦也然龍之詞猶有
凶焉

注曰浪穹縣名隸於大理府之鄧川州按史仲彬
云 師菴在平陽其地爲浪穹所轄則平陽又浪
穹之村落也吉者自此安居十餘年凶者未幾而
賢能死大理與鶴慶相鄰今爲金滄道治之

壬辰十年

師三十六
歲爲僧

春正月 師在浪穹之新菴

三月弟子應能卒夏四月弟子應賢卒

從亡隨筆曰能與賢卒師哭之慟並葬於菴東
錢士升贊曰草莽 君臣間關生死朝夕一堂靡
進靡已生也同袍死也同壘彌茨骨香千秋不毀
草莽史臣曰乙丑之夜 帝命羣臣以師弟稱獨

二子卒書弟子何也羣臣雖遵命稱師而未改初服賢能祝髮受高皇遺牒則真弟子矣良玉仲彬馮灌黃直書故官者貴之也應能應賢書弟子者親之也灌直書卒於途彬書卒於獄憫之也亦榮之也廖鄭諸臣不書卒者不得其年月也

附錄 致身錄載庚子秋彬至廖平王之臣蔡運郭節家訪之云皆已故而不詳其地與時表忠記載雪和尚死於蜀鄭洽死於楚廖平劉仲牛景先死於浙王資金焦死於祥符而皆不詳其年月宣

德戊申 師乃聞廖平之死梁仲節壬子猶在後不知所終

師初納弟子應慧

草莽史臣曰 建文爲比丘十載未納一徒賢能卒始納慧智慧旣殞始納辨空蓋不堪其寂寞耳然戊午冬智卒遁去始終不二者僅一辨空同心人之難得亦可知矣世傳 建文在粵西其徒甚衆其然豈其然乎

冬十一月馮灌黃直來省

癸巳十一年

師三十七歲為僧

春正月 師在浪穹淮直辭歸

初 勅宥諸臣親黨

初 建文諸臣親黨得禍之酷皆出陳瑛之報私讎瑛既誅上意漸寬然姦黨之禁未除時庶吉士錢習禮者江西人與練子寧姻恆為其鄉人所持不自安以告楊榮榮乘間以聞 上欣然曰使練子寧在朕固當用之况習禮乎即日 勅諭三法司凡姦黨遠親未獲者勿問黨禁稍解至十三年

夏則盡解焉

夏 師南遊程濟應慧從六月還菴納弟子應智

冬十月鑄應明鐘

從亡隨筆曰夏濟慧從 師南行至旬六月還菴

納弟子應智十月鑄應明鐘 師為銘篆之

甲午十二年

師三十八歲為僧

春正月 師在浪穹

秋 師學易數

草莽史臣曰易之為書廣大悉備理與數相御而

行未有不習其數而深于理者也 師精于祿命
亦易數之支流濟筮如神不專訓詁又兼通禽遁
諸書 師之學其學於濟耶觀 師之自少而壯
大抵由潛而見躍而飛然未免當飛而亢中旬以
後則舍亢入潛退藏于密變化屢遷而不可測矣
以孝孺之學古通經豈獨不知有易理而壯頗用
罔卒成滅頂之凶政爲其偏于執理不能通變于
未窮耳噫易數之不可不學如此
冬弟子應慧卒納弟子辨空

草莽史臣曰 師在滇南凡三納弟子曰應慧曰
應智曰辨空又有雪菴弟子名了空亦往來門下
慧卒智遜了空者卽濟所授以從亡隨筆者也當
此之際能以 師爲歸如二三子者豈可以庸人
目乎原書慧死予特比楊葉二臣之例書弟子某
卒春秋之義樂與人爲善公羊子曰因其可褒而
褒之

紀十三年

師三十九
歲爲僧

春正月 師在浪穹三月祭弟子應賢應能于墓

從亡隨筆曰己未三月 師夢賢能慟而覺設奠祭之

注曰此偶祭也是冬因灌直卒立亡臣之主後五年仲彬來省語及菴成而二子卒 師命舉所餽奠焉則歲時之祭有不止于此者

夏四月 師出東遊程濟從

五月 上諭法司妄告姦惡者罪之

上諭三法司官曰如今各處有妄告姦惡的好生擾害良善自今年八月初五以前但有被告已提未提到官的都饒了不問今後但有指姦惡爲繇擾害良善的不饒時黃巖縣民告其豪家持建文時士人包彝古上楚王書稿與衆聚觀語多指斥有司請罪之 上曰必是人與豪家有怨欲行報復且旣禁告姦而復罪之是令不信也勿問

秋八月 師遊于衡山

故禮部侍中黃直刑部司務馮灌來省弗遇卒于途從亡隨筆曰夏 師出遊路逢灌直留其家數日八月師與濟遊于衡山還訪灌聞已赴滇 師卽

還滇偶宿蕭寺見廡下有一病者視之即灌直也
因畱視之竟死埋于寺東 師題其石曰兩忠之
墓

冬十月師還立亡臣之主于菴東

丙十四年 師四十一歲為僧

春正月 師在浪穹

夏給事中胡濙巡行天下歸復 命擢為禮部左侍

郎

濙自丙戌出至是還 朝以久勞于外故有是擢

未幾復出大約在滇楚間至癸卯七月乃還

冬命濟作從亡臣傳藏之山巖 師自敘之

錢士升曰昔徐偃王愛民無權曰吾賴于文德而

不明武備及走死彭城羣臣從之不忍去中山君

出亡挈戈隨死者二人雖曰得士之報要于大義

有不可解者若夫枕股易塊之事君則失矣其臣

亦未為得也趙襄子反自晉陽高赫無功而上賞

曰拘阨之中唯赫也不失臣禮噫君臣之義無所

逃于天地之間寧得論有位與無位耶五蛇從龍

周流天下亦計及十九年後之富貴耳孰與程濟輩三十九年之窮老且萬死哉善乎宛支之言曰我君是事非事國也臣曰從君豈曰從國作從亡諸臣列傳

編修程濟績溪人

弟子應賢松陽人

弟子應能杞縣人

侍讀史仲彬吳江人

侍郎廖平襄陽人

編修吳成學浙江人

侍中黃直常州人

司務馮灌黃巖人

鎮撫牛景先沅人

侍郎金焦貴池人

編修趙天泰三原人

按察使王良祥符人

參政蔡運南康人

中書宋和臨川人

中書郭節連州人

中書梁良玉定海人

中書梁中節定海人

郎中梁田玉定海人

待詔鄭洽浦江人

指揮王資杞縣人

太監周恕海州人

太監河洲海州人

鎮撫劉仲杞縣人

監正王之臣襄陽人

論曰從亡諸臣見于忠賢奇秘錄寥寥九人耳自從亡隨筆致身錄及劉琳拊膝錄出于得三十

餘人然三書又互有異同雪菴和尚史以爲郭節
程氏以爲吳成學河西傭史以爲趙天泰程劉以
爲王之臣補鍋匠史以爲卽王之臣程劉以爲黃
直東湖樵史以爲牛景先劉程以爲郎中柳一景
太學生王志又王良乃浙江按察使闔室自焚死
難史氏亦以爲從亡竊意程從 君子白龍浪穹
之間昕夕不離而史侍書往來通信所見聞未必
周悉且諸人晦迹逃名卽與于從亡之約者未必
盡知總之出程書者近是故是編以隨筆爲主

王廷宰論曰論者謂諸公不忍赤族之誅飄然自
遠于江湖之外嗟乎此非知諸公之深者矣君爲
社稷死則死之爲社稷亡則亡之假令闔宮自焚
倉皇莫救諸公生爲烈士死爲厲鬼甘心九死遑
恤其他 建文君而旣亡矣執羈勒以從東西南
北惟其所向捐親戚去墳墓重趼萬里行乞市上
吞聲忍痛淚落如雨至今讀其書想見其瑣尾流
離險艱危苦之狀未有不傷心酸鼻者而諸公心
如鐵石之死靡他 建文亦卒借是免嗟嗟運鍾

鼎革天地變色家庭之際尤不忍言眾目眈眈幾
爲功首然網罟設而神龍逝矰弋懸而靈鳥翔自
吳而楚而蜀而滇往返數十年 故主舊臣自悲
自吊 建文君旣全揖讓之實而 文皇又無慘
夷骨肉之名則諸公之所維持者大也伯夷採薇
不救太白之懸豫生漆身無補鑿台之戮諸公視
此不更卓越非常也哉

草莽史臣曰濟傳從亡 師爲之序可謂千古奇
書然藏之絕域深山已無可覓故取錢氏列傳以
補其缺而附以廷宰之論猶取太倉之贊以當祭
死難之文耳錢氏以隨筆爲準然隨筆亦難盡信
如補鍋匠事足見一斑王良係駐錫七家之一故
未敢輕削其名王昇王鉞未出都門似難與史程
並列茲定爲原約從亡二十四人其餘或雖未從
亡而宣力于 師或雖無宣力而與聞踪跡又三
十餘人附之末簡使後人得以觀覽焉

西平侯沐晟

駙馬梅殷

駙馬沐昕

尚書巖震直

尚書胡濙

都御史景清

御史曾鳳韶

檢討程亨

中書郭良

主錄僧溥洽

提點王昇

太監鄭和

少監王鉞

吳江丞鞏德

隱士杜景賢

道人張靜

弟子應慧

弟子應智

弟子辨空

雪弟子了空

廖平弟年

史仲彬子晟

史氏僕失名

池民余得華

嘉善民史弘

土官鳳氏

夔州二黃冠

鶴慶僧失名

均州僧行祥

舊內臣吳亮

附錄 峨眉亭詩一個忠成九族殃全身遠害亦

天常夷齊死後君臣薄力為君王固首陽又神女

廟有詩云襄王此日知何處唯見朝雲暮雨時自

稱東海逋臣書蓋亦亡臣之筆云

注曰按致身錄原載神樂觀之約止二十二人其

吳成學黃直本從亡隨筆入之王良死難從亡俱

列其名疑以傳疑之意御史曾鳳韶在內殿目觀

出亡故兩列之景清梅殷皆知 建文之不死峨

眉亭詩係行遁諸臣之數此類甚多其名或傳或

不傳不能盡載也

十一月故吳王允熲卒

允熲懿文第三子初封杭州未之國靖難起兵熲嘗承上命以親王爲監軍壬午七月降封廣澤王居漳州衡王允燧降封懷恩王居建昌是年九月召還京以不能諫正建文皆廢爲庶人禁錮允燧以年少改封未幾而殞熲至是卒燧不知其卒之歲月英宗復辟詔釋吳庶人建庶人出居鳳陽聽其自便建庶人文堯尙存吳惟有庶母孀姊老婦數人皆七八十矣

丁酉十五年

師四十一歲爲僧

春正月師在浪穹

二月谷王穗謀反伏誅

穗與景隆開門迎附後改封長沙陰養死士造戰船號指揮張成爲師尙父會蜀王子崇寧王悅燁得罪于父逃奔穗穗詭衆曰我前開金川門蓋以出建文帝帝今在此欲借以起兵蜀王聞之奏其事上嘆曰我何如待穗而有此謀乎詔楚王楨等議其罪廢爲庶人自焚死

師別築靜室於鶴慶山中

注曰此按隨筆所記也浪穹在大理府東南鶴慶軍民府在大理府西北圖志有方丈諸山

三月漢王高煦以不軌削其護衛

高煦性兇狡多力善戰建文初從仁宗入朝魏國公徐輝祖言其爲人不止叛君且叛父固請留之建文弗聽夜入輝祖廐竊其良馬以逃及靖難兵起煦宣力頗多因此萌奪嫡之志每結黨乘間讒害仁宗封國青州不肯行已而復私畜亡

命造器甲謀爲不軌上聞之大怒命褫其冠帶繫之西華門欲重罪之賴仁宗固救乃免上嘆曰如是所爲將來必不能靖乃削其護衛徙之山東樂安州

秋七月了空來省

從亡隨筆曰七月雪和尚弟子了空來知雪已死按遜國臣記雪菴和尚名暨不知其姓當變時和尚披剃走重慶府之善慶里山水奇絕和尚欲止之其里隱士杜景賢知和尚非常人亟爲之寺和

尙好讀楚辭時時買一冊袖之登小舟急棹灘中
流朗誦一葉輒投一葉于水投已輒哭哭已又讀
葉盡乃返衆莫之知景賢益憐重之或曰和尙爲
建文時御史死之日其徒問師卽死宜銘何許人
和尙張目曰松陽問姓名不答有詩若干篇

鄭曉曰余聞之陶徵士云齊二客魯兩生史並失
其名操行之難而姓名翳然撫卷長嘆不能已已
余獨幸夫雪菴諸君子忍諾茹荼卒晦其名以不
滅其族也

釋寂育曰了空自雪菴化後卽以 建文爲依歸
又親受從亡隨筆則其非庸人可知然姓字不傳
並雪菴之名亦紛紛二三其說博雅之士靡不惜
之予以爲至人忘名真忠義亦不羨名彼其視雪
空二字亦影外之塵耳又或以雪菴之哭讀楚辭
與程之焚菴削塚皆未免瞋心難化不知天至誠
所結萬劫弗磨佛印曰三世諸佛則是一個血性
漢趙州臨濟正是此一流人碌碌者何足識之
草莽史臣曰此一雪和尙也仲彬以爲郭節程濟

以爲吳成學又或疑爲葉希賢其以爲希賢者蓋以世傳和尚爲御史又答弟子爲松陽人故耳夫葉從師于滇粵跬步弗離又未聞其有弟子卽彬以爲節亦未必然蓋雪依景賢居于蜀而節在連州彬先後省師皆至連訪節則非居蜀者明矣在古人本不羨名而異同之際尙論者不得不考釋寂育者號阿含少爲諸生趙其姓逃名苦行獨喜爲詩其甲申九日詩云夢迴越石雞前舞想到淵明醉後探乙酉元旦詩云溪聲昨夜愁偏舊山色今朝苦更新想其胸次蓋亦雪空之流亞云

冬十一月

師適衡山程濟從

從亡隨筆曰十一月胡濙鄭和復至滇踪跡師

師與濟往衡山作感慨詩曰我行自東山深水窮虎跡蛟踪我行至南地炎河乾楔猢猻巢環我行至西陰雨霏霏戈戟野施我行至北異霧毒靄燭龍沉色我悽我惶何道可行噫何道可行

戊十六年

師四十一歲爲僧

春正月師在衡山三月還自衡山居于黔

建文年譜 卷三
夏五月命程濟爲圃

從亡隨筆曰五月命濟爲圃 師作菜根歌曰菜
色青兮菜根辛兮菜兮菜兮似予情兮

建文庚辰賜進士及第胡廣卒

庚辰廷試以禮樂德刑爲問廣對策指斥親藩擢
第一賜名靖壬午夏首先迎附復故名歷任大學
士廣爲人恭儉寬弘而乏骨鯁人以爲與漢胡廣
同初廣與解縉同侍 成祖問二人有子女否縉
對有子廣云臣妻孕未審男女 上曰女也朕言

不妄汝可爲昏已而果女遂如命暨縉以讒死家
徙邊廣家欲其女改聘不從強之女入室引刀截
耳流血被面泣涕言曰薄命之昏 皇上主之父
面承之欺君毀信何以生爲家人大驚乃不敢強
後遇赦歸卒成婚得偕老云

草莽史臣曰吾作年譜徧考諸書得奇女四人黃
觀妻廣孝姊及兩胡氏也三人之烈俱可入遜國
忠臣唯廣女與 建文無涉以彼其人使得讀書
登科第肯爲乃父之所爲乎且安知非以身諷也

廣不書官而書庚辰及第視瑛瑋薄乎云爾

巳亥十七年

師四十三歲爲僧

春 師在黔注釋佛經

從亡隨筆曰己亥 師注楞嚴法華經署曰文和

尚

附錄 建文至貴州金竺長官司羅永菴嘗題詩

壁間其一曰閱罷楞嚴磬懶敲笑看黃屋寄曇瓢
南來瘴嶺千尋迴北望天門萬里遙歎段久忘丹
鳳輦袈裟不換袞龍袍侍臣此日知何處惟有羣

鳥早晚朝

注曰此詩出鄭端簡遜國記必注楞嚴時所作觀
此則己亥春尚在黔中可知也瓢本作標犯 懿
文諱恐屬傳錄之訛金竺係宣撫非長官司今隸

貴州貴陽府

秋九月命濟輯禽遁諸書不果

朱山樵曰兵家有演禽之術云出于諸葛武侯遁
卽奇門及五遁也濟素精于此 建文出亡險危
中多賴以免故命濟輯之旣而自知無所用故不

果輯以濟之權謀技術應是劉文成姚恭靖之流
乃甘老空山竟不能使建文之復辟豈非天哉
豈非天哉



